

KERATAN AKHBAR

TARIKH : 14 OKTOBER 2023
AKHBAR : BERITA HARIAN
MUKA SURAT : 3

Ekonomi MADANI bina negara lebih baik, mampan

Ekonomi MADANI bina negara lebih baik, mampan

Kerajaan 'naikkan siling dan lantai' pastikan manfaat berkualiti, saksama

Kerajaan melalui pendekatan Ekonomi MADANI memperkasakan rakyat dengan menstruktur semula ekonomi demi membina negara lebih baik dan mampan, di samping terus meningkatkan kualiti hidup rakyat.

Dalam menjayakannya, mobilisasi sumber dan usaha bersepadu pihak berkepentingan termasuk kerajaan, pihak swasta, syarikat berkaitan kerajaan (GLC), pertubuhan bukan kerajaan (NGO) dan rakyat diperlukan secara menyeluruh.

Justeru, kerajaan memperkuatkan dua teras utama iaitu 'Menaikkan Siling' dan 'Menaikkan Lantai' bagi memastikan manfaat berkualiti dan saksama mengikut nilai MADANI, iaitu kemampanan, kesejahteraan, daya cipta, nilai hormat serta keyakinan dan ihsan, dicapai.

Langkah jangka masa pendek dan sederhana dalam kerangka itu menjadi asas dan melengkapkan dasar yang baharu dilancarkan, termasuk Pelan Hala Tuju Peralihan Tenaga Negara (NETR), Pelan Induk Perindustrian Baharu 2030 (NIMP 2030) dan Kajian Separuh Penggal Rancangan Malaysia Ke-12 (KSP RMK-12).

Misalnya, matlamat jangka masa pendek ditetapkan untuk menangani isu mendesak yang memberikan kesan kepada rakyat dan perniagaan seperti mempercepatkan projek, membasmi kemiskinan tergar melalui pelaksanaan Inisiatif Pendapatan Rakyat.

Hal ini bertujuan menyediakan



peluang meningkatkan dan mempelbagaikan pendapatan yang boleh memberikan kebebasan dan ketahanan kewangan, selain konsep Payung Rahmah diperkenalkan bagi meringankan beban kewangan serta menangani cabaran kos sara hidup.

Pada skala lebih besar, kerangka Ekonomi MADANI menetapkan matlamat jangka masa sederhana melalui tujuh penunjuk prestasi utama yang akan dicapai negara dalam masa 10 tahun.

Usaha ini termasuk menggiatkan semula sektor perindustrian dan meningkatkan kecekapan agihan peruntukan sumber serta barangan dan perkhidmatan bagi memacu pertumbuhan ekonomi lebih kukuh, disokong oleh dasar fiskal lebih mampan. Matlamat ini akan dicapai me-

lalui dua fokus, iaitu Malaysia: Peneraju Ekonomi Asia yang merangkumi tujuh inisiatif iaitu Agenda Serantau (ASEAN); Malaysia sebagai Destinasi Pelaburan; Mengantarabangsakan Syarikat Pemula Tempatan serta Perusahaan Kecil dan Sederhana (PKS); Peneraju Ekonomi Islam Global; Usahawan Mikro dan Sektor Tidak Formal; Pertumbuhan Hijau Demi Daya Tahan Iklim; Guna Tanah dan Keterjaminan Makanan.

Melalui fokus Meningkatkan Kualiti Hidup Rakyat ia merangkumi lapan teras iaitu Peluang Pekerjaan dengan Gaji Bermakna; Kesaksamaan Peluang; Perlindungan Sosial untuk Semua; Pembaharuan Perkhidmatan Penjagaan Kesihatan; Pembaharuan Pendidikan dan Sumber Manusia; Infrastruktur dan Pe-

ngangkutan Awam; Kemudahan Asas dan Perumahan Mampu Milik kepada Semua Rakyat.

Dalam pada itu, tata kelola yang baik dan penyampaian perkhidmatan awam yang cekap menjadi asas untuk mendapatkan kepercayaan semua pihak berkepentingan bagi menyokong dan melaksanakan tindakan kolektif ke arah transformasi yang diperlukan.

Pembaharuan struktur dan institusi Parlimen, media dan perkhidmatan awam akan mengukuhkan tadbir urus dan kapasiti institusi, sementara penyampaian perkhidmatan awam yang cekap disokong agenda digitalisasi penting untuk memacu pertumbuhan ekonomi di samping mendepani realiti perkembangan global.